卷第四百三十八 畜獸五

大下 李道豫 朱休之 李叔堅 王瑚 李德 溫敬林 庾氏 沈霸 田琰 王仲文

崔惠童 李義 胡志忠 韓生 杜修己 袁繼謙

李道豫

安國李道豫,宋元嘉中,其家犬臥於當路。豫蹶之,犬曰:「汝即死,何以踏我?」豫未幾而卒。(出《述異記》)

朱休之

有朱休之者,元嘉中,與兄弟對坐之際,其家犬忽蹲視二人而笑,因搖頭而言曰:「言我不能歌,聽我歌梅花。今年故復可,那汝明年何?」其家靳犬不殺。至梅花時,兄弟相鬥,弟奮戟傷兄,收係經年。至夏,舉家疫死。(出《集異記》)

李叔堅

漢汝南李叔堅少為從事,其家犬忽人立而行,家人咸請殺之。叔堅曰:「犬馬諭君子,見人行而效之,何傷也?「後叔堅解冠榻上,犬戴之以走。家人大驚,叔堅亦無所怪。犬尋又放灶前畜火,家人益驚愕,叔堅曰:「兒婢皆在田中,犬助畜火,幸可不煩鄰里,亦何惡也?」居旬日,犬自死,竟無纖芥之災,而叔堅終享大位。(出《風俗通》)

王瑚

山陽王瑚字孟璉,為東海蘭陵人。夜半時,有黑幘白單衣吏詣縣扣閣。迎之,忽然不見,如是數年。後伺之,見一老狗黑頭白驅,猶故至閣。使人以白,孟璉殺之,乃絕。(出《搜神記》)

李德

司空東萊李德停喪在殯,忽然見形,坐祭床上,顏色服飾,真德也。見兒婦孫子,次戒家事,亦有條貫。鞭樸奴婢,皆得其過。飲食既飽,辭訣而去。家人大小,哀割斷絕,如是四五年。其後飲酒多,醉而形露,但見老狗,便共打殺。因推問之,則裡中沽酒家狗也。(出《搜神記》)

溫敬林

晉秘書監太原溫敬林亡一年,婦桓氏,忽見林還,共寢處,不肯見子弟。兄子來見林,林小開窗,出面見之。後酒醉形露,是鄰家老黃狗,乃打死之。(出《幽明錄》)

庾氏

太叔王氏後娶庾氏女,年少美色。王年六十,常宿外,婦深無忻。後忽一夕見王還,燕婉兼常,晝坐,因共食。奴從外來,見之大驚,以白王。王遽入,偽者亦出,二人交會中庭,俱著白帢,衣服形貌如一。真王便先舉杖打偽者,偽者亦報打之。二人各敕子弟,令與手。王兒乃突前痛打,遂成黃狗。王時為會稽府佐。門士雲,恒見一老黃狗,自東而來。其婦大恥,發病死。(出《續搜神記》)

沈霸

吳興沈霸,太元中,夢女子來就寢,同伴密察,唯見牝狗,每待霸眠,輒來依床。疑為魅,因殺而食之。霸復夢青衣人責之曰:「我本以女與君共事,若不合懷,自可見語,何忽乃加恥歟?可以骨見還。」明日,收骨葬岡上,從是乃平復。(出《異苑》)

田琰

北平田琰,母喪,恒處廬,向一暮夜忽入婦室,密怪之,曰:「君在毀滅之地,幸可不甘。」琰不聽而合,後琰暫入,不與婦語。婦怪無言,並以前事責之。琰知魅,臨暮竟未眠,衰服掛廬。須臾,見一白狗攫廬銜衰服,因變為人,著而入。琰隨後逐之,見 大將升婦床,便打殺之。婦羞愧病死。(出《搜神記》)

王仲文

宋王仲文為河南郡主簿,居緱氏縣北。得休,因晚行澤中,見車後有白狗。仲文甚愛之,欲取之。忽變形如人,狀似方相,目赤如火,差牙吐舌,甚可憎惡。仲文與仲文奴並擊之,不勝而走。未到家,伏地俱死。(出《搜神記》)

崔惠童

唐開元中,高都主婿崔惠童,其家奴萬敵者性至暴,忍於殺害。主家牝犬名「黃女」,失之數日。適主召萬敵,將有所使。黃女忽於主前進退,咋萬敵。他人呵叱不能禁,良久方退,呼之則隱,主家怪焉。萬敵首云:「前數日,實烹此狗,不知何以至是。」初不信,萬敵云:「見埋其首所在。」取以為信,由是知其冤魂。(出《廣異記》)

李義

 慮夢中之事實。哀哉!此為子之難,非不孝也,上天察之!」言訖大哭,再奠而回。其在家母已知之矣。迎義而謂之曰:「我與爾為母,死而復生。再與爾且同生路,奈何忽然迷妄,卻於空塚前破其妖夢?是知我復死也。」乃仆地而絕。義終不測之。哀號數日,復謀葬之。既開其塚,是其亡母在是棺中。驚走而歸,其新亡之母,乃化一極老黑犬躍出,不知所之。(出《大唐奇事》)

胡志忠

處州小將胡志忠奉使之越,夜夢一物,犬首人質,告忠曰:「某不食歲餘,聞公有會稽之役,必當止吾館矣。能減所食見沾乎?」忠夢中不諾,明早遂行,夜止山館。館吏曰:「此廳常有妖物,或能為祟。不待寢食,請止東序。」忠曰:「吾正直可以御鬼怪,勇力可以排奸邪,何妖物之有?」促令進膳。方下箸次,有異物其狀甚偉,當盤而立。侍者懾退,不敢傍顧。志忠徹炙,乃起而擊之,異物連有傷痛之聲,聲如犬,語甚分明,曰:「請止請止!若不止,未知誰死。」忠運臂愈疾,異物又疾呼曰:「斑兒何在?」續有一物,自屏外來,閃然而進。忠又擊之,然冠隳帶解,力若不勝。僕夫無計能救,乃以撲,??羅曳入於東閣,顛仆之聲,如坏牆然。未久,志忠冠帶儼然而出,復就盤命膳。卒無一言。唯顧其閣,時時咨嗟而已。明旦將行,封署其門,囑館吏曰:「俟吾回駕而後啟之。爾若潛開,禍必及爾。」言訖遂行。旬餘,乃還止於館,索筆硯,泣題其戶曰:「恃勇禍必嬰,恃強勢必傾。胡為萬金子,而與惡物爭。休將逝魄趨府庭,止於此館歸冥冥。」題訖,以筆擲地而失所在。執筆者甚怖,覺微風觸面而散。吏具狀申刺史,乃遣吏啟其戶,而志忠與斑黑二犬,俱僕於西北隅矣。(出《集異記》)

韓华

唐貞元中,有大理評事韓生者,僑居西河郡南。有一馬甚豪駿。常一日清晨,忽委首於櫪,汗而且喘,若涉遠而殆者。圉人怪之,具白於韓生。韓生怒:「若盜馬夜出,使吾馬力殆,誰之罪?」乃令撲焉。圉人無以辭,遂受撲。至明日,其馬又汗而喘。圉人竊異之,莫可測。是夕,圉人臥於廐舍,闔扉,乃於除中窺之。忽見韓生所畜黑犬至廐中,且嗥且躍,俄化為一丈夫,衣冠盡黑,既挾鞍致馬上,駕而去。行至門,門垣甚高,其黑衣人以鞭擊馬,躍而過。黑衣者乘馬而去,過來既,下馬解鞍,其黑衣人又嗥躍,還化為犬。圉人驚異,不敢泄於人。後一夕,黑犬又駕馬而去,逮曉方歸。圉人因尋馬蹤,以天兩新霽,歷歷可辨,直至南十餘里一古墓前,馬跡方絕。圉人乃結茅齋於墓側。來夕,先止於齋中以伺之。夜將分,黑衣人果駕馬而來,下馬,係於野樹。其人入墓,與數輩笑言極歡。圉人在茅齋中,俯而聽之,不敢動。近數食頃,黑衣人告去,數輩送出墓穴。於野,有一褐衣者顧謂黑衣人曰:「韓氏名籍今安在?」黑衣人曰:「吾已收在□練石下。吾子無以為憂。」褐衣者曰:「慎毋泄,泄則吾屬不全矣。」黑衣人曰:「謹受教。」褐衣者曰:「韓氏稚兒有字乎?」曰:「未也,吾伺有字,即編於名籍,不敢忘。「褐衣者曰:「明夕再來,當得以笑語。」黑衣唯而去。及曉,圉者歸,遂以其事密告於韓生。生即命肉誘其犬。犬既至,因以繩係,乃次所聞,遂窮□練石下,果得一軸書,具載韓氏兄弟妻子家僮名氏。紀莫不具,蓋所謂韓氏名籍也。有子生一月矣,獨此子不書,所謂稚兒未字也。韓生大異,命致犬於庭,鞭而殺之。熟其肉,以食家僮。已而率鄰居士子千餘輩,執弧矢兵仗,至郡南古墓前。發其墓,墓中有數犬,毛狀皆異,盡殺之以歸。(出《宣室志》)

杜修己

杜修己者,越人也,著醫術,其妻即趙州富人薛贇之女也,性淫逸。修己家養一白犬,甚愛之,每與珍饌。食後,修己出,其犬 突入室內,欲齧修己妻薛氏,仍似有奸私之心。薛因怪而問之曰:「爾欲私我耶?若然,則勿齧我。」犬即搖尾登其床,薛氏懼而私 焉。其犬略不異於人。爾後每修己出,必姦淫無度。忽一日,方在室內同寢,修己自外入,見之,即欲殺犬。犬走出。修己怒,出其 妻薛氏歸薛贇。後半年,其犬忽突入薛贇家,口銜薛氏髻而背負走出。家人趁奔之,不及,不知所之。犬負薛氏直入恒山內潛之。每 至夜,即下山,竊所食之物,晝即守薛氏。經一年,薛氏有孕,生一男,雖形貌如人,而遍身有白毛。薛氏只於山中撫養之。又一年,其犬忽死。薛乃抱此子,迤邐出,入冀州乞食。有知此事,遂詣薛贇以告。薛氏乃令家人取至家。後其所生子年七歲,形貌醜陋,性復兇惡。每私走出,去作盗賊。或旬餘,或數月,即復還。薛贇患之,欲殺焉。薛氏乃泣戒其子曰:「爾是一白犬之子也,幼 時我不忍殺。爾今日在薛家,豈合更不謹。若更私走,出外為賊,薛家人必殺爾。恐爾以累他,當改之。」其子大號哭而言曰:「我 稟犬之氣而生也,無人心,好殺為賊,自然耳,何以我為過?薛贇能容我,即容之;不能容我,當與我一言,何殺我也?母善自愛,我其遠去不復來。」薛氏堅留之,不得,乃謂曰:「去即可,又何不時來一省我也?我是爾之母,爭忍永不相見。」其子又號哭而言曰:「後三年,我復一來矣。」遂自攜劍,拜母而去。及三年,其子果領群盜千餘人,自稱白將軍。既入拜母后,令群盜盡殺薛贇之家,唯留其母。仍焚其宅,攜母而去。(出《瀟湘錄》)

袁繼謙

少將袁繼謙郎中常說:頃居青社,假一第而處之,素多凶怪,昏曀,即不敢出戶庭。合門敬懼,莫遂安寢。忽一夕,聞吼聲,若有呼於甕中者。聲至濁,舉家怖懼,謂其必怪之尤者,遂如窗隙中窺之,見一物蒼黑色來往庭中。是夕月晦,觀之既久,似黃狗身而首不能舉。遂以鐵撾擊其腦。忽轟然一聲,家犬驚叫而去。蓋其日莊上輸油至,犬以首入油器中,不能出故也。舉家大笑而安寢。(出《玉堂閒話》)

返回 >> 太平廣記 >>

上一篇 下一篇 本書來源:開放文學網站

